



**UDRUŽENJE GRAĐANA ZA POVRAT STARE
DEVIZNE ŠTEDNJE U BiH i DIJASPORI**

RAIFFEISEN BANKA
ž.r. 1610450036820073
e-mail: nnisic@spinter.net
www.starastednjabh.org

Sjedište: Banja Luka 78000
I. G. Kovačića 139b
tel. 051/380-738
fax. 051/381-374

UPRAVNI ODBOR
Broj: 1421/08
Banja Luka, 19.08.2008.

**VISOKI SUDSKI I TUŽILAČKI SAVJET
BOSNE I HERCEGOVINE
71000 Sarajevo
Ul. Kraljice Jelene bb**

**PREDMET: Primjedbe na rad sudova i tužilaštava u Bosni i
Hercegovini**

Poštovana gospodo,

U organizaciji savremene države i uslovima podjele vlasti na zakonodavnu, izvršnu i sudsku, kako je organizovana i čemu teži i Bosna i Hercegovina, velika je odgovornost nosilaca funkcija u svakom segmentu vlasti i svih zajedno za uspješno funkcionisanje savremene, demokratske i pravne države. Mi u udruženju građana za Povrat stare devizne štednje u Bosni i Hercegovini i dijaspori smatramo da postoje ozbiljne deformacije i nedostaci u svakom segmentu vlasti, ali smo posebno ogorčeni na opštu pojavu na primjeru stare devizne štednje, u kojoj se "nezavisno pravosuđe" stavlja u funkciju korumpirane i kriminalizovane vlasti iz druga dva segmenta, rušeći princip podjele vlasti i principe nezavisnosti.

Mi u Udruženju smo svjesni i sigurni u to da nema ni jednog sudije ni tužioca u Bosni i Hercegovini koji ima bilo kakvu dilemu da je stara devizna štednja imovina zaštićena Ustavom BiH i Evropskom konvencijom za zaštitu ljudskih prava i osnovnih sloboda i njenim protokolima i da se trebaju i moraju donositi presude o povratu stare devizne štednje njenim vlasnicima, a da se moraju krivično goniti svi koji su pokrali – opljačkali staru deviznu štednju ili se na njoj i danas bogate.

Poštovana gospodo,

Sa velikim žaljenjem moramo konstatovati da ste i pored toga što je sve oko stare devizne štednje čisto kao suza zakazali. Što je još gore na posredan način ste doprinijeli da model ponašanja Bosne i Hercegovine prema njenim državljanima vlasnicima stare devizne štednje bude inspirativan za republiku Sloveniju i Republiku Srbiju, da se prema njima i one tako ponašaju, iako su svojim građanima uredno vratile staru deviznu štednju. Veoma mali je broj sudija u Bosni i Hercegovini, koji su se odvažno stavili u funkciju pravde i časno obavili svoj posao tako što su donosili presude po predmetima stare devizne štednje, a nisu te predmete turali u fioke i ormare. Kada su u pitanju tužilaštva situacija je tragično katastrofalna. Pljačka stare devizne štednje je, uz sva multipliciranja koja su slijedila, najveća pljačka koju poznaje savremena civilizacija, a da i pored svega toga i mnoštva neupitnih dokaza, tužilaštva nisu preduzela niti jedan korak kako bi priveli pravdi bilo koga iz plejade pljačkaša. Zar i pored svega ovoga tužioci mogu mirno spavati. Ovo nije samo tragedija vlasnika stare devizne štednje, ovo je tragedija pravde i pravičnosti, ovo je istinska tragedija države. Činjenica što se uglavnom radilo o visoko pozicioniranim osobama iz izvršne vlasti i njima bliskim osobama ih nimalo ne opravdava.

Ovom prilikom ukazujemo i na posljednja dešavanja koja su u vezi sa postupkom koji je tužbom pokrenulo 3600 vlasnika stare devizne štednje 2004. godine za povrat svih deviza. Poslije "uobičajene" štednje od opštinskog do kantonalnog suda, naše urgencije iz 2005. godine dešava se do sada neviđena farsa. Umjesto da sud postupi po tužbi i presudi, Opštinski sud Sarajevo je prenio Agenciji za financijske, informatičke i posredničke usluge d. d. Sarajevo – Poslovnica Novo Sarajevo, kao nadležnom prvostepenom organu za verifikaciju obaveza po osnovu stare devizne štednje predmet sa pojedinačnim podacima tužilaca. Sud je mogao provjeriti ko je od podnosilaca tužbe iz tog predmeta, verifikovao svoju deviznu štednju i to smatrati kao činjenicu da je odustao od tužbe u cijelosti ili djelimično. Mogao je bar provjeriti podatke podnosilaca tužbe, pa onda njihove podatke dostaviti teritorijalno nadležnoj agenciji za verifikaciju. Mogao je ovo, mogao je ono, ali nije. Mogao je i morao uraditi ono što mu je istinski smisao postojanja, mogao je presuditi po Ustavu, po zakonu.

AFIP je zatim počeo da se pojedinačnim dopisima obaraća svim podnosiocima tužbe, pozivajući ih na verifikaciju ističući da, ukoliko se ne odazovu njihovom pozivu, će se smatrati da su odustali od zahtjeva za verifikaciju i tužbenog zahtjeva.. Umjesto da radi svoj posao, a to bi podrazumjevalo da su na izdržavanju višegodišnjih zatvorskih kazni rukovodioci agencija koje se bave verifikacijom stare devizne štednje, zbog silnih malverzacija koje su počinili, pravosuđe Bosne i Hercegovine

je AFIP proizvelo u pravosudni organ koji bi trebalo da odlučuje o tužbenom zatjevu. Oštro smo proestvovali i iz AFIP-a i nakon toga više pismima podnosiocima tužbe ne navode upozorenje da će se smatrati da su odustali od tužbenog zahtjeva. Umjesto da verifikuju svoju štednju po pozivu AFIP-a vlasnici stare devizne štednje pisma dostavljaju u Udruženje. Verifikacija je propao projekat i nju ništa ne može spasiti, pa ni ove malverzacije u koje su se upetljali i pravosuđe i nosioci pravosudnih funkcija.

Poštovana gospodo,

Zbog svega navedenoga mi iz Udruženja građana za povrat stare devizne štednje u BiH i dijaspori apelujemo na Vas da insistirate kod sudija i tužilaca da sude i tužuju, ponašaju se po zakonu i Ustavu, po međunarodnim konvencijama i standardima, da rade po svijesti i savjesti. Neka sude isto kao i Evropski sud za ljudska prava u Strazburu. Neka ne nasjedaju na priče o "bankrotu države", jer je to izmišljotina onih koji godinama krađu i naše i državno, ali eto država posrće, a nikako da bankrotira. Bojimo se da je u protivnom izvjesniji jedan drugi bankrot, a to je moralni bankrot. Moralni bankrot je opasniji od svakog drugog bankrota i vodi kataklizmi i propasti iz kojih nema povratka. Zato Vas molimo da ozbiljno shavatite ovo pismo i poruku koju Vam šaljemo.

S poštovanjem,

**Za Upravni odbor
PREDSJEDNIK
Svetozar Nišić**

Dostavljeno:

1. Vijeće ministara BiH;
2. Parlamentarnoj skupštini BiH;
3. Vladi Federacije BiH i Vladi RS;
4. OHR-u;
5. Jan-Paul Costa, predsjednik Evropskog suda za ljudska prava
6. Tery Davis, generalni sekretar Vijeća Evrope,
7. Tomas Hamerberger, komesar za ljudska prava pri Vijeću Evrope,
8. Tužilaštvu BiH;
9. SIPA Finansijsko obavještajno odjeljenje i
10. Mediji